

中國地方志集成

雲南府縣志輯 ⑦⑤

民國大理縣志稿(四)

鳳凰出版社 ● 上海書店 ● 巴蜀書社

大理縣志稿卷之二十六

藝文部三上

關於人事之紀載上

先師廟碑記

趙傳弼

其略曰洪維我朝域混車書遐陬荒服靡不臣僕惟南詔龍馭親臨耿在帝心民必蠲其徭農必利其本軍必重其賞官守者必厚其俸有君如此臣忍負之至元乙酉之春雲南諸路行中書省議恐南方之人逸居無教風聲氣息永流於彝於是中奉大夫參知政事郝公分政大理觀山川之雄麗甲於西南實爲是邦都會之地喟然嘆曰學校建矣儒教弘矣惟吾夫子廟貌未興而宗師吾

道者莫知所自乃首析已俸延僚采而集議之是時宣撫同知趙好禮檄使是邦力襄厥事亦傾行篋以資其不足憲僉張貞員外賈天祐與焉卜廟地於府治之東未營之始荆榛塞途坎窞沒脛公以身率先卿士從庶民從乃鳩土工命梓匠委本路經歷段興董其役遇荆榛而燼之坎窞而平之不日而基乃成掄材陶瓦安甍植木大殿兩廡成於乙酉之冬三門耳牆畢於丁亥之間聖像堂堂從祀穆穆春秋二丁告朔既望僚屬學官諸胥弟子環列於殿堂之下禮畢觀者如堵於嚴盛哉此王化自北而南也且南詔本哀牢彝之後其爲國也方處虛離人或聰達今創修學廟使舊染之俗咸與維新大參中奉郝公之力也昔魯公作泮宮而詩人

誦之文翁興蜀學而史官書之此今昔之所樂道也傅弼記之以
銘曰仰之彌高點山蒼蒼資之也深洱水湯湯乃作泮宮厥位孔
陽大參郝公力爲主張土工梓人躬親較量乙酉之冬大殿兩廊
丁亥之閏三門耳墻天啟斯文萬古素王道由東魯教被南荒杏
壇爰啓木鐸載揚聲名文物禮樂綱常昔吾未見今焉可望使被
氈裘化爲典章儒行舉醇與進互鄉廟貌之尊山高水長於粲灑
埽悠久無疆

奉勅賦送僧無極歸大理序

學錄 金文徵

洪武十七年二月八日翰林院侍講學士李淵等奉制賦詩送大
理僧無極等歸詩旣成軸復序其首惟吾儒積學勞心非一朝夕

以成其業然後得遇聖朝居翰苑清華之地恩榮豈易得哉今無極生於遐荒去中國萬里慕義來朝一旦獲覲清光館之上剝錫之異饌賜衣贈名以華其躬製詩命和以榮其行殊恩異數皆四方遠人所未嘗得者所以者何以無極能兼通東魯西竺之學有詩歌賦頌之才超乎土俗之表故也今天章炳煥昭如日星無極當什襲寶藏永鎮山林至若翰林篇章中書字畫亦皆一時之選苟遇識者出而示之俾觀感而化慕中國文明之盛不其偉歟天界諸僧詩并附於後

後序

學錄 金文徵

大理在雲南治之西古南詔都會也點蒼爲關樑榆水環之其地

最險且固乃能首率金齒爨人望風款附上深嘉焉有僧名法天者向慕中國三十年矣今與其徒不遠萬里來朝京師上書累數百言及其所譟南征賦誦心婉語喜動宸衷賜衣與宴特異他邦已而授之僧綱俾歸以善道導其邦人焉噫亦榮甚矣法天侈上之榮而諸大夫士賦詩爲餞復以序屬之文徵文徵觀皇帝繼天立極其治中國也用堯舜禹湯文武之治治也其治邊蠻亦治以中國之治也豈嘗曲循其俗哉然而君臣父子之倫禮樂刑政之具其昭昭然揭日月於中天固無間於海內外也始雲南之未入版圖非其一方之人舉不欲達中國也有爲之梗者耳及天兵一揮頑獷授首若大理之屬款附恐後彼誠有慕中國之治哉觀

於法天尤可見也何也法天釋氏流也夫釋氏者外形骸而入解脫絕嗜慾而悟真空其於世漠如也然猶慕中國若此豈非有感於聖人在上耶法天歸化導其人服中國之治萬世子孫咸被遐福則於釋氏亦有光矣若徒誇遊覽之勝寵遇之恩則豈法天之志哉而亦非大夫士之所望也

侍御中谿李元陽行狀

御史李 選

萬歷八年中谿李先生年八十有四月二十日卒於家其嗣君中書舍人傅方視草內閣選時承乏刑科中舍君以選遊先生門下屬爲狀義不敢辭先生諱元陽字仁甫世居點蒼山十八溪之中因號中谿其先浙之錢塘人祖諱順者仕元爲大理路主事愛

戀山水遂家焉順生福福生通通生連連生山山生壽壽生讓讓
生位即先生父也號蓬谷以先生貴封監察御史妣董氏贈太孺
人太孺人夢龍負日入懷者三乃生先生遂以是命名云先生爲
兒時不與羣兒戲好讀書弱冠夢異人授錦三丈許令吞之尋補
郡學弟子員力學稍暇輒登城睇覽見山海風雲藻思煥發文益
奇恣善決疑義凡天文兵法諸書過目輒洞其要嘉靖壬午中雲
貴鄉試第二丙戌成進士初授翰林院庶吉士尋以議禮忤權臣
出補分宜分江西秋闈事竣丁內艱歸服闋補江陰會靖江海寇
劫掠先生濱水操建城樓嚴兵衛賊乃遁去民賴以安有被盜者
尉以囚來囚亦自謂盜先生曰釋之衆皆莫寤後得眞盜人以爲

神明交有縊其妻而以自殺告者先生詰之立服巡撫顧公責逋賦甚嚴死者動以百計按部至常州先生曰逋多不可卒辦且以完報顧素知先生得免者二百餘人通邑感之爭自輸納先生以廉節著名發奸擗伏不避強禦舉孝表墓興利除害政嚴而有惠愛小民自以爲慈父母去之日流涕遮道者百餘里爲立生祠勒碑述善政百餘事先生既遷戶部主事時選官僚大學士夏公招之不赴少宰霍谿門無私謁知先生賢改監察御史先生疏略云昔成周卜世三十卜年八百然觀於周禮其經緯國體人事微細無不具則知王者必修人事以稱天所以命之之意不舉歸之天以忘人事也陛下始即位以爵祿得君子近年以來以爵祿畜小

人其敢言類如此大臣愈不憚然先生獨立不阿如故也巡按八
閩大學士餞之手出官名納公袖謂宜薦劾也比至廉知貪黷狀
疏劾之所至風靡一省廓清監臨丁酉塲屋得人最盛試錄盡出
其手識者評爲天下第一上議幸承天上疏乞止上怒欲杖之是
夜台臣悚懼不能寐先生獨卧睡達旦人稱爲眞御史後扈從出
都聞大學士所選宮僚皆江南富人即於行在疏劾之至承天復
疏皆不報議先生外補會荊州知府缺乃奏曰荊州要地御史李
元陽堪任遂授之荆襄之間四百餘里無井泉先生至即捐俸穿
井數十又作石池以飲馬荆地濱於大江古堤既圯七州縣皆爲
藪澤巡撫顧璘發銀八萬兩責之司水利者久無成績先生毅然

爲之甫期而堤成荆人遂名其堤與井爲李公云章聖梓宮歸承
天閣寺乘勞肆暴所至府守皆被縛勒以三千金贖一日候祭白
袱驛寺人下鐵彈如雨撫按而下皆奔避先生獨不移寺人皆吐
舌曰奇男子也遂免縛首疏藩府不法者十事藩府自是皆斂戢
嘗試諸生得太岳張居正卷大器之拔爲六百人之冠時太岳年
方十三後果然皆以先生爲知人先生以外艱去任因遂里居不
出不營生業薄自奉厚施予如婚嫁喪葬飢寒冤抑以至橋堤道
路列爲三十二事日以自課至老不少替雖廢家產不恤也平生
未嘗一日廢書於宅後作默遊園郭外作纓江艷雪二臺鑑湖綠
野二樓日與禪衲討論其中屢月不返先是十八溪暴漲衝城門

沒民盧舍先生憫之以問大父秀眉公公曰郡本邪龍地古建寺塔彈壓之民始居平土今塔多廢甯復作崇吾欲修而力未逮汝他日可復之先生謹識至是奮然修舉自壬寅迄己卯四十餘年凡所建造不遺餘力水患用息愛靜坐至宵分方就寢胸次豁朗知在事先人以爲有仙術先生曰天字泰定耳何仙之有先生爲人誠寔樂易洞見肺腑口不言人過其教人曰惟一誠字何事不辦中年著心性圖說爲羅洪先所許修撰楊慎嘗與坐終日每出謂人曰見中谿神貌如臨水月鄙吝自消聆其語如聞洪鐘令人頓醒先生旣倡明性學亦時與諸生講文藝凡從游者類皆敦世善俗先生作詩文初不經意援筆輒就世以白香山蘇東坡擬之

嘉靖間編郡志後二十年復作續志未幾雲南通志又出先生手書成示弟子曰往見志書皆載山川物產人名而已不及兵食與法度之所急是何異千金之子急其珠寶狗馬而緩其衣食產業之數乎凡先生著作非性命極理之談必濟世安民之法年八十餘聰明挺健少壯莫能及儀觀秀整望之如神仙焉卒前十日召門人子弟至默遊園曰自今至十日寅時吾當謝世吾嘗以一死生外形骸爲念今其時矣至期端坐叱家人勿當前驅言畢而逝

漢相祠記

僉事王維賢

諸葛忠武侯輔漢昭烈帝首事蜀國以經理天下屬益州郡渠帥雍圍殺太守而附吳使郡人孟獲誘致諸彝應圍侯南征所向戰

捷遂斬閩等惟孟獲收圍餘衆以拒獲驍捷素爲彝漢所服侯募
生致之七縱七擒而侯猶遣獲獲止不去曰公天威也南人不復
反矣侯遂至滇池四郡皆平雲南邃古爲荒徼自秦楚來僅能通
道若乃剷除廢置陳布紀綱則自侯始迨我皇明迅掃廓清一變
爲區夏而侯之功於是烈矣初孟獲據佛光寨去大理百五十里
守關險隘侯不得入乃由漾濞而北破佛光駐軍大理攬形勝定
規畫創侯在大理經營最久南中各郡秩禮相望乃大理無專祠
郡人像侯雜廁佛寺甚非妥明神以稱崇報之意惟賢來巡茲土
謂是缺典謨諸卿大夫士議上中丞白巖公可其請乃陟巘降原
得名地於郡城西郊岡阜蜿蜒風氣翕集詢知始有廢寺在西偏

書院在東偏而墨食之正歸然獨留宜若有待岡後有壇壝各祭天台父老相傳爲侯祭天畫卦之所遺跡宛然初侯南征詔賜金鉄鉞一具曲蓋一柄前後葆羽鼓吹各一部虎賁六十人其諸畀有王者儀衛遂得攝以祀天也歟茲卜適附馮焉又若有冥數然者爰命工營度提調則郡守蔡紹科而二守王璋實董厥役取材於廢寺故無甚費因心以正祀典故民不告勞經始於癸卯仲夏之望至秋杪告成統白日有奇舊有書院仍存祠左而祠右隙地治圃以肄射俾此邦人士時遊息焉嘗謂皇天之厚人必問命雋傑以贊所不及而雋傑之出必以天下生人爲己任亦惟率自天真以相協於時觀武侯之起三顧勤馳驅受遺命表出師精誠懍

歎曾不懼疑及其計謨所定乾旋坤鎮微機所發神出鬼沒號召
流行秋殺春生明威震警雷旬電掣雖當時雅稱雄武者皆望影
顛頓而莫之敢撓開誠布公豈伊異人而人自歸心率其真而已
矣夫太虛直渾渾爾而風霆霜露揮霍不可窮詰其究也俾品彙
各得其理豈足異哉顧尙論者徒以其翊帝胄承正統將爲侯重
或以功止三分而未及混一有遺憾焉夫神器非私物也謂藉以
宣布猷爲弘濟生人無負於天之委重者已爾浮雲塵土至人何
與焉且夫成敗者數也故當其氣運之乖大勢已去雖孔孟亦莫
之能挽者君子亦盡心焉耳矣苟區區得失之較也即以曹孟德
之能畢智力以奄有區域自謂得策曾不再傳已默付於他人之

手其究如之何也乃惟侯之忠義大節經略遠猷千載而下雖里巷婦孺猶能話述遺事而萬里裔彝匍匐威靈屏息莫敢踰越其所爲立人道而俾補於天工者旣弘多矣予每慨乎季俗漸功利之餘而世儒鮮通方之論使後世不見古人眞經濟之本而斯民弗獲享大道無私之至治考斯祠也有遐思矣

忠誠祠記

楊士雲

嘉靖元年冬十一月分守大叅巴蜀劉公某至大理覽郡志徵政教旣進屬吏與學之師弟子鄉之父兄子弟告之曰昔武侯南征由越竊渡瀘入洱平永昌遂入滇池迹其納馬謖之言難或者之諫其經畧大猷寔震陽煦固茲土之永懷者矧侯爲漢隸魏自隆